



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7



Harry Kane Borussia
Moenchengladbach den masayatetsü

Kim-i repranga North Korea
indang cruise missile tendang



VOL. XXIII ISSUE NO. 142 (ADOK 142) DIMAPUR ROGONÜ (FRIDAY) METSÜREMI (MARCH) 06, 2026

₹ 5.00

Iran-i Gulf lenirtem dang America nunger meindoktsü ashir

Tehran, Metsüremi/March 05 (Agencies): Iran-i Gulf nung aliba linük ajunga dang pei litsü nungi America nunger ajak meindoktsü aser US military bases ajunga indoktsü metetdaksüogo.

Iran Parliament nung züngsem kati, "UAE, Saudi Arabia, Kuwait, Oman, Qatar, Bahrain, Turkey aser item mesükba linük temi Iranian missiles tsüboba aliba tatem kati arudaktsünera, parnokti par litsü nungi America nungertem meindoktsüla aser US military bases ajunga agientsüla," ta ashi.

US-Israel aser Iran tsingta rara tenzüker troknü bubai ayaoka aiba mapang iba tekum dangtsü ya metetdaksü, aser kasa mapang US-Israel lungjemer February 28 nungi amakba tayang kepzüka Tehran-i maneni Tel Aviv aser Gulf linük balala nung aliba military facilities nung missiles amshia amaker.

United States aser Iran den tang rara adoka aliba nungi Iran nung nisung 1,230 süogo, ta Iran indang Foundation of Martyrs and Veterans Affairs ajanga ashir.

Brehostibarnü Israel-ia parnokti aliba tesem amakba aser Lebanon nung Iran-i yariba Hezbollah telungpur dak amakba osang sangdongogo.

Bodhbarnü US-i Sri Lanka anasa Iranian warship ka amak dang nisung 80 dak tema tepset, ta Iran indang Foreign Minister Abbas Araghchi-ashi. Indian navy semdangba Iranian frigate Dena nungya ketdangsur 130 jungnüa liasü aser iba rong international waters nung lia tekum dangtsü kecha magütsü amak, ta pai ashi.

Brehostibarnü Revolutionary Guards-ia Gulf north tsütsü US tanker ka amak aser iba rong nung mi jangrua lir ta ashi. Revolutionary Guards-i sangdong ka nung Strait of Hormuz ajangtsü ya Islamic Republic mulung lir, ta shia lir.

Kasa mapang Iran anema US-i tayimtsü amshia amakba anendaktsütsü aser Congress nungi temelaba agir ang mitkar inyaksangshitsü atema Bodhbarnü Washington nung ken o ka benokba Republicans temi nokdangogo.

Nagaland nung GI tagging inyakyim asendenshir



Nagaland Handloom and Handicraft Development Corporation indang Conference Hall, Dimapur nung March 5, 2026 nü traditional crafts aser handloom products asoshi Geographical Indication (GI) inyakyim atema senden ka amenba nung Planning Advisor, North Eastern Council (NEC), Som Kamie-i jembidang tangokba noksa nung angur.

Dimapur, Metsüremi/March 05 (TYO): Nagaland indang traditional crafts aser handloom products asoshi Geographical Indication (GI) inyakyim atema stakeholders senden ka March 5, 2026 nü Nagaland Handloom and Handicraft Development Corporation indang Conference Hall, Dimapur nung mena liasü.

Nagaland indang traditional crafts aser handloom products atema GI applications agütsüba nung yariteptsü aser jangjateptsü nukjidong nung iba senden ya North Eastern Handicrafts and Handlooms Development Corporation Limited (NEHHDC) ajanga Ministry of Development of North Eastern Region (MDoNER) den lungjemer ayongzüka liasü.

Senden nung Y. Lipongse Thongtsar, Managing Director, Nagaland Handloom and Handicrafts Development Corporation (NHHDC) menden liasü, kong Som Kamie, Planning Advisor, North Eastern Council (NEC), aser Mara Kocho, Managing Director, NEHHDC Head Office, Guwahati natia o jembia liasü.

Institution kecha nunga Vande Mataram mamshitsü: NSF

Dimapur, Metsüremi/March 05 (TYO): Nagaland nung institution kecha nunga Vande Mataram matemtsüla aser amshitsü memerangtsüla, ta Naga Students' Federation (NSF) ajanga Brehostibarnü tekum dangtsü ashi aser BJP legislator Temjen Imna Along-i Nagaland Legislative Assembly (NLA) nung iba ken atemba bhukuma jembiba asoshi kangasa mepelaba lemsatepa liasü.

Ibai state telungzüke nung aliba institutions nung Indian national song tashiyim agi benoka amshidaktsüba asoshi temeden bushitsü aser yimya ka ama kum daktsütsü merangba lir, ta NSF-i sangdong ka nung aija ashi aser Ministry of Home Affairs ajanga Vande Mataram ya high-level official sentong kar nung national anthem jakdang atemtsü mesüra atemtsü totuyuba agütsüba asoshi taoba mapang

Iba senden nung Monmayuri Saikai, Senior Executive (DoBD), North Eastern Handicrafts and Handlooms Development Corporation Limited ajanga Geographical Indication (GI), yangji tajangzüke aliba aser registration agitsü yimya balala indang PowerPoint presentation agüja liasü.

Geographical Indication (GI) registration atema Nagaland nungi products 24 jangjateta lir, ta ketdangsurtemi metetdaksü. GI tagging nung tajangzüke aika lir aser ibai shishilempaba kisung nung masü saka lisopur sobaliba wazüka ayuba aser ajungketba nunga tongtipang lir ta ashi.

North Eastern Region nung tang registered GI products 89 lir aser yangji handicrafts oset 48, alu nungi adokba oset 28, manufactured products ti aser chiyongtsü pongu lir, ta iba senden nung metetdaksü.

Iba senden nung Pochury Textile, Pochury Shawl, Zeliang Textile, Sumi Shawl, Sumi Textile, Ao Textile, Tikhir Jewellery aser Tikhir Textile densema Nagaland nung aliba kin balala indang GI products

akumtsü teimma alibatem sayua liasü.

Laisa GI registration atema Angami, Chakhesang, Chang, Khiamniungan, Konyak, Lotha, Phom, Rengma, Sangtam aser Yimkhiung kin temi tapet traditional products jangjatepba mapang lir ta ashi.

GI registration nungi tajangzüke anguba angatetdakja state nung awareness campaigns ayongzüke ta senden nung metetdaksü aser GI tagging ya textiles aser handicrafts kisung masü saka traditional jewellery aser danga indigenous products tema sütetsü ta ashi.

Iba senden nung Planning Department, Government of Nagaland; Industries and Commerce Department, Government of Nagaland; North Eastern Council (NEC), Shillong; North Eastern Handicrafts and Handlooms Development Corporation, Guwahati; aser Nagaland Handloom and Handicrafts Development Corporation nungi ketdangsurtem aser kin balala nungi lenirtem dena liasü.

Nagaland, Mizoram & Tripura University convocations nung VP adentsü

Dimapur, Metsüremi/March 05 (TYO): India linük indang Tatong Tir C.P. Radhakrishnan-i Hokulbarnü nungi tenzüka asemnü atema Northeastern states asem semdangtsü aser Nagaland, Mizoram aser Tripura nung aliba central universities asem indang convocations nung tongti tesemdang ka ama adentsü, ta ketdangsurtemi Brehostibarnü ashi.

Pai Nagaland semdangba mapang Hokulbarnü Zunheboto district kübok Lumami tonga arutsü aser tongti tesemdang ka ama Nagaland University indang ti buba convocation nung jembitsü.

Tatong Tir Radhakrishnan-i March 7 nü Mizoram University indang 20 buba convocation nung jembitsü.

March 8 nü tatong tir ya Tripura University indang 14 buba convocation nung dena yangjia o jembitsü.

Iba dak sendakba nung Aizawl nung Mizoram Chief Secretary Khilli Ram Meena-i anir terenemshiba senden ka menogo.

Iba senden nung department balala nungi teshimtet ketdangsur temi iba sentong tiptema agitetsü atema inyakyim balala indang jembia liasü.

Vice-President Radhakrishnan ya March 8 nü Tripura University

indang 14 buba convocation nunga tongti tesemdang alitsü.

Pai Agartala tezülen Hapania nung aliba International Trade and Fair Centre nung 'Lakapati Didis' kar den ajuruteptsü aser Lichubagan nung aliba Albert Ekka Memorial Park nung akhum agütsütsü.

Tripura University nung 2024 aser 2025 nung convocation sentong magiteti liasü.

Iba sentong nung kaketshir nem certificates, degrees, gold medals aser PhD degrees agütsütsü.

Department balala nungi kaketshir 283 nem gold medals agütsütsü, research scholars 149 nem PhD degrees agütsütsü.

VP-i Tripura yimtiba Agartala tezülen Suryamaninagar nung aliba university campus nung convocation sentong tenzükeptsütsü.

Tripura Governor Indra Sena Reddy Nallu, Chief Minister Manik Saha aser university indang Chancellor Ahmad Javed nungertemia sentong nung jembitsü lir.

Tripura University ya October 1987 nung amenok aser Parliament nung agizüka Tripura University Act, 2006 kübok July 2, 2007 nung Central University ka akum.

Tang iba university kübok colleges 64 affiliate süa lir.

Shamator nung blacksmith training agiogo



Dimapur, Metsüremi/March 5 (TYO): Shamator District Administration aser Department of Employment, Skill Development & Entrepreneurship na longjemer March 5 nü District Cultural Hall, Shamator nung Blacksmith Training sentong ka ayongzüka agiogo. Iba sentong indang partner ji ZIS liasü.

Sentong nung o jembiba mapang EAC Shamator Mekato J Aye-i, district nung skilled labourer 3,000 anitetsü district administration nükjidong lir ta ashi. Pai, training nung shilem agirtem dang iba maongka ya sentisüa agitsü ajungshiba den,

tangara aikati iba training nung shilem agitsü jangraba lemsatepogo, ta shisem.

Pai, trainee tem dang hadirtem lemsüba matai parnok shisatsü aser sempettem amshi tenzüksü ajungshia liasü. Maneni paisa, mongintem aser trainer tem nungi angazüksü, tebilemba lemsateptsü aser yintsümba nung parnok indang traditional skill tem arantetsüba atema iba sabang ya amshitsü ajungshia liasü.

District ya nok, mertsüng aser tanga sobaliba hadirtem tajung tsünga amshiba atema kanga nüngutu lir ta shia, pai training nung shilem agirtem dang teti

amshiba handirtem yangluba dak dang merangloki iba mapa ajanga koda pei libaliro ajungketsü iba atema dang masü saka lokti aser rongsenketzüng nung teyari agütsüba atema lenmang tasen bushitsü ayongzüka.

Merang ngutetba ajanga meimchirtem taküm liyonga aotsü aser terenlok atema koda temelenshi bener arutsü, iba indang jembiba mapang pai sentong nung shilem agirtem dang shishilembatsü atema parnok nükla ulushitsü ajungshi.

Iba sentong ya John Anar lenisüba nung agi aser R Kiuju-i lokti pela agizükba o jembia liasü.

Wokha nung angati LPG Connections Awareness sentong agitsü

Dimapur, Metsüremi/March 5 (TYO): District Administration aser Supply Department na den gas agency tem (IOC, HPL) longjemer Pradhan Mantri Ujjwala Yojana (PMUY) 3.0 kübok Wokha jila nung awareness-cum-free connection exercise sentong ka ayongzüka agitsü.

Iba scheme ya Ministry of Petroleum & Natural Gas, Government of India-i amenokba lir, koba India ajunga nung sensaker tetsürtem aser talisa yimdak yimtsüngtem nung aliba tetsürtem nem angati LPG gas cylinder connection agütsüba nükjidong nung "Clean Fuel, Better Life" to improve health, safety, and living conditions" omen nung ajemdaker benoka inyakdar.

Awareness aser LPG gas

cylinder lemsüba sentong ya March 6 nü 10 ako nungi 30 ako tashi NST Area, Police Point, aser Niropen Colony ta Wokha jila kübok tesem asem nung agitsü.

Wokha jila nung alirtem aser talisa tetsürtem shirnoki iba maongka ya aginer parnok dang item kuli kakettem bener arutsü metetdaksüogo.

1. Applicant indang Aadhaar Card
2. IFSC code dena Bank account tejanga
3. Kinungertem sayua Ration Card aser parnok indang Aadhaar card
4. Applicant indang Phone number

District administration-i temsüa aliba lisopurtem dang iba sentong nung shilem agia scheme nungi tajangzüka agitsü ayongzüko.



Noklak kübok Sanglao yimtsüng nung March 4 nü Aspirational Block Programme kübok Sampornata Abhiyan 2.0 sentong agiba mapang Young Professional (Land & Water Resource) Niti Aayog, Shipra Singh den district ketdangsürtem tangokba noksa nung angur.

North East Japan Caravan atema osangbenertem jaoker

Dimapur, Metsüremi/March 5 (TYO): India nung Japan Embassy-i, Japan Foundation, New Delhi aser Indian Council for Cultural Relations (North East) den longjemer 'North East Japan Caravan: 2025-2026,' ayongzüka agiba indang osang abentsü asoshi osangbenertem jaokogo.

Iba sentong ya March 6 aser 7 nü State Hall Academy, Kohima, Nagaland nung agitsü, ta metetdaksüogo.

Anogo ana amungsü aliba benjung nung inyakyim balala sayatsü. Sentong nung Japanese film sayuba, cosplay, yukata semdangba tajangshiba, Japanese calligraphy, origami

workshops, Japan oshi dak sendakba inyakyim aser tanga sobaliba sentongtem agitsü.

Iba sentong ya ajak atema lapoktsüogo aser iba ajanga Japan indang sobaliba angazüksü asoshi maongka agütsüba, ta Japan Embassy, First Secretary (PR & Culture) Takashi Kobayashi-i metetdaksü.

Razaphe kübok NH-329 nung apu ka nung gari tulu senzütsü menelar

Dimapur, Metsüremi/March 5 (TYO): Sub-Divisional Officer (Civil), Dhansiripar office sangdong ka ajanga, NH-329A nung Razaphe yimtsüng anasa Chainage 65.625 km nung aliba apu tila ka nung gari tulu mesenzütsü asoshi tenokdangba agütsüogo, kechiyong apu jenjang mejungi lir.

Apu nung senzütsü lendong keta aliba osang office-i angazükba sülen March 3 nü iba tetuyuba agüja liasü. Apu tsüngtong tonga oa asadangba sülen ketdangsürtemi apu kanga tashi meiti akümba ngutetogo aser iba ajanga gari senzüsenpongtsü asoshi timtem kümdaksüogo.

Tetyuba nungsa iba apu nung gari tulu maneni senzüra nüburtem asoshi lendong tulu

asütsü aser apu ya tamajungba küma raksatsütsü ta shia lir.

Iba tia tensa apir ken o dak sendaka aliba department-i apu meyanglushi tashi iba apu nung gari tila dang senzüdaksütsü asoshi telemetba agiogo. Iba tetuyuba sülen manidakertem temzüng ozüng dak ajemdaker merenshitsü ta kasa sangdong ajanga metetdaksüogo.

Iba tetuyuba ya Vejoyo Swuro, Sub-Divisional Officer (Civil), Dhansiripar-i agütsü aser osang ya Deputy Commissioner, Chumoukedima office nungi Shreyansee Jain, SDO (Civil) (HQ)-i agüja liasü.

Ketdangsürtemi nüburtem aser khu belenertem dang apu meyanglushi tashi iba tetuyuba sülen tashi anga anidaksü metepshia metetdaksüogo.

Pungro nung Kisan Ghosti, capacity building training agi



Dimapur, Metsüremi/March 5 (TYO): ATMA Kiphire, Pungro block-i ayongzüka Agri and Allied sector dak sendakba nung Kisan Ghosti, capacity building Training-cum-demonstration sentong agiogo, koba Krishi Mapper App ajanga tawa sayaba geo-tagging feature amshia agiogo.

Inyakyim digitize asütsü aser Nagaland nung aluyimertem atema crop demonstrate asüba alu indang data bendentsü asoshi benoka inyaka aliba inyakyim nung iba ya-a shilem ka lir.

Kisan Gosthi sentong ya Pungro yimtsüng nung February 24 nü Integrated farming system (IFS), tsünisenpongtsü tali adokdaksütsüba aser aluyimertem libaliro jenjang

ajungketsütsüba dak rangloker agia liasü.

Training ya February 25 aser 26 nü Iponger and New Vongti yimtsüng nung "fishery pond management aser goatry farm management" dak rangloker agi. Kasa mapang nung demonstration mapang aonsotsü tsünüba yimya sayua liasü.

Maneni February 27 aser 28 nü Pungro yimtsüng aser Thetowong yimtsüng nung oyster mushroom production technology, record & book keeping dak sendakba nung tangazükba agütsü.

Sentong ya BTM, Moanaro I Ao aser ATM, Merennungba Imchen na lenisüba nung agi aser AI Omega aser BTT Convenor, M.Yochung senior VFA na shisalen sayur liasü.

Session balala agiba mapang shisalen sayurtemi tetsü tebou mapang nungi amshia aruba metsüjangnatsütem wazüka ayutsü, tetsü tebou mapang nungi bentshia aruba aluyimba yimya tajungba küma melenshitsü, chemical tali mamshitsü aser bio-fertilizers amshitsü aser organic pest control inyakyim benoka inyaksü koda tongtibang iba indang lemsatepa liasü.

Iba den bendenloksema Farm School, Food Security Group (FSG), aser Seed Money (SM) inyakyimtem sentong agiba mapang amenoka liasü.

Training yagi February 24 nungi 28 tsüngda Pungro, Iponger, Thetowong aser New Vongti yimtsüng ayimjemogo.

Pughoboto SDO (C)-i metetdaksür

Dimapur, Metsüremi/March 5 (Agencies): Sub-divisional Officer (C) Pughoboto, Yithachu Thur (NCS)-i sangdong ka ajanga nüburtem ajak dang International Women's Day 2026 amungba nüngdem nung March 7 nü CHC Pughoboto nung anepdang 9 ako nungi tenzüka angati Health Camp ka ayongzüka agitsü ta metetdaksüogo.

Iba Health Camp ya CHC, District Administration Pughoboto aser Faith Welfare Society nungeri ayongzüko aser Faith Welfare Society-i senotsü teyari agütsüba.

Nüburtem nem specialist Health Care agütsüba nükjidong nung iba camp ayongzüko aser camp

mapang Kidney, Liver, Thyroid, Blood Sugar screening amala diagnostic screening tem agitsü maongka agütsüba.

Maneni tenük, medical aser ENT, Head & Neck, Surgical specialist, Dental, Oral aser Maxillofacial service tem atema-a consultation asoshi maongka agütsüba. Medical consultation, diagnostic service, mozütem ajak ya beneficiary ajak nem angati agütsüba.

Paisa, nüburtem aser talisa tetsür aser lokti nung tekübokba jenjang nung alirtem iba camp ajanga ajangzükdaksütsü asoshi Village Council Chairman aser GB tem dang yimtsüng aser jila balala nung iba osang takok tashi prokshitsü metepshia metetdaksüogo.

India-i Iran tongti lenir Khamenei asüba atema mangyim lemsatep



New Delhi, March 05, 2026: Brihostibarnü India Foreign secretary, Vikram Misri-i New Delhi nung aliba Iran Embassy semdanga Iran ambassador to India, Mohammad Fathali ajurudang tangokba noksa nung angur.

New Delhi, March 05 (Agencies): Brihostibarnü India-i Iran nung tongti lenir, Ayatollah Ali Khamenei asüba atema mangyim jashi lemsatepogo.

India Foreign secretary, Vikram Misri-i New Delhi nung aliba Iran Embassy semdanga mangyim jashi lemsatepba kaket nung sign asü.

February 28 nü Iran aser Israel nati senteper Iran amakdang Khamenei tepsetba sülen tang mezüing India-i Iran tongti lenir asüba atema mangyim jashi lemsateper.

Misri-i New Delhi nung

amenoka aliba Iran embassy semdanga mapang nung Iran ambassador to India, Mohammad Fathali dang Iran lenir asüba atema India-i mangyimer, ta metetdaksü.

Ministry of external affairs (MEA)-ia foreign secretary Misri-i Iranian ambassador Fathali ajurudang tangokba noksa ka lemsatep.

India-i Khamenei asüba atema tejashi lemsatepyonga US aser Israel nabo maitsü.

Tang tensa nung ajemdaker India-i West Asia nung tesünep atema telok ajak dang atsü-anem akatsü aser rara

anentsü ajungshir.

Ato kilonser Narendra Modi-ia phone ajanga Kuwait, Bahrain, Oman, Saudi Arabia, Qatar aser United Arab Emirates lenirtem den jembioago aser iba mapang nungji Iran-i Gulf nung aliba linüktem amakba atema aitsü.

Tang tensa dak sendakba nung Congress densema tanga opposition party temi, West Asia nung rara dak sendakba nung India-i pei tangatetba tejangja sangdongtsüla, ta akhangba mapang ka nung Misri-i Iran Embassy semdang.

Iran amakba atema Farooq Abdullah-i US aser Israel na aitsür

Srinagar, March 05 (Agencies): Taoba mapang Jammu & Kashmir chief minister Farooq Abdullah-i Iran amakba atema US aser Israel na sashi aitsüogo.

Abdullah-i, tanga linük ka amaktsü atema linük ka dak danga tashi mali, ta metetdaksü.

National Conference (NC) Tirisa, Iran aser Israel na tsüingda rara tamajungba akümba mapang nung India sorkari pei tangatetba tejangja metetdaksütsüla, ta ashi.

Srinagar nung osangbenertem den jembidang Abdullah-i, "Iran ya nüchiso ngua aliba linük ka lir, anungji United States-i iba linük amakba ya tim masü. Linük kati tanga linük ka amakbaji tai. Tashi tulu aliba linüktemi tanga linüktem mamokbangtsüla," ta ashi.

Paisa tamalen US-i Venezuela densema tanga linüktem amakba-a aitsü.

Abdullah-i, "Tang rara ajanga alima tesem ajak kongshitsü. Iba tensa ya tamajungba dang kümra ibaji ajanga alima nung timtem tulu adoktsü. Iba ama tensa ya tamajungba küma Third

World War-a adoktsüa akok," ta metetdaksü.

Abdullah-i, "Iran tongti lenir tepsetba atema Muslim nungertem janga jashir. Pei tebilemba lemsatepa longkak aittsü temeden lir, ajisüaka tensa raksatsüsabo masütsüla," ta ayongzük.

US aser Israel nati senteper amakdang Iran tongti lenir Ayatollah Ali Khamenei tepsetba anema Jammu & Kashmir tesem balala nung nüburtemi longkak aita arudar.

Paisa, United States-i Iran azüoktsü meranger, ajisüaka ibaji ajanga lendong tulu ataloktsü, ta metetdaksü.

Tang Iran nung aliba Kashmiri nung kaketshirtem atema tebilemtsü kaja Abdullah-i, par jabaso Jammu & Kashmir Chief Minister Omar Abdullah-i Kashmiri nung kaketshirtem ajak kümzüka anir arutsü atema Ministry of External Affairs den tongtepratepa inyakdar, ta metetdaksü.

Paisa, kaketshirtemji tesem kati anir ogo aser parnok gari lenmang ajanga anitetba sülen tayimtsü ajanga anir arutsü, ta metetdaksü.

PM Modi-i tekeraba nung Iran aser Ukraine nung rara anentsü ajungshir

New Delhi, Metsüremi/ March 05 (Agencies): Brihostibarnü Ato kilonser, Narendra Modi-i Ukraine aser Iran nung tekeraba nung tara anentsüla; mangatetep ajak bentettsü atema lenmangji ken o jembitsüba dang, ta metetdaksü.

New Delhi nung Finland Tir, Alexander Stubb den külemi osangbenertem den jembidang Ato kilonser Modi-i, "India aser Finland napronglai oziing kübok alitsü aser ken o jembiba ajanga dang mangatetep bentettsüla ta bangjemer. Rara ajanga mangatetep bentettsü makok. Iba tangatetba ya Ukraine aser West Asia tensa napongla atema lir. Tekeraba nung rara anentsü onoki imlar aser teti atema yimjung alitsü nükjidong nung inyakba maparen ajak onoki pusemer," ta metetdaksü.

Modi-i, "Tanü alima nung tensa majungba aser tarutsü tia mejangjaba mapang ka ajangshidar. Alima tesem aika nung rara lir, Ukraine nungi tenzka West Asia tashi nung rara lir. Iba ama alima tensa mapang ka nung India aser Europe na ya alima nung diplomatic tashi tulu alirtem lir aser India o Europe na tsüingda tesendaktep kanga junga

kümdar. Alima nung tensa junga alitsü, terenlok alitsü aser azükaru alitsü atema asenok tsüingda amalitep ajanga tashi tasen agütsür," ta metetdaksü.

2022 küm February ita nung Ukraine nung rara tenzüka liasü. Russia-i Ukraine amakba ya World War II sülenbo Europe nung rara tuluba lir. Küm pezü tashi raraan arudang nisung meyrjang aika süogo aser million aika jenshiogo.

Ukraine-i anüolen linüktem den tesendaktep yangluba aser North Atlantic Treaty Organisation (Nato) nung adentsü tejangraba lemsatepba sülen Russia-i Ukraine amak tenzüka liasü. Linük aikati iba rara anentsü atema tiyongtsüü ia inyakogo saka tang tashi rara manener.

Tang tesüsa February 28 nü US aser Israel nati senteper Iran amakba sülen Iran-i West Asia nung aliba linüktem nung US sepaitem indang kiojen aika amaker.

Iran-i ballistic missiles aser drones aika amshia Israel amakba den külemi UAE, Saudi Arabia aser Qatar nung US sepaitem amenoka aliba kiojen amaker. Tang tashi nung iba rara nung nisung 1,000 dak tali süogo.

Bihar CM Kumar-i Rajya Sabha election atema tenüing agütsüogo



March 05, 2026 nü Patna nung Bihar Chief Minister, Nitish Kumar-i Rajya Sabha election nung tokteptsü atema nomination file asüdang tangokba noksa nung angur. Kasa noksa nung Union Home Minister, Amit Shah-a angur.

New Delhi, March 05 (Agencies): Brihostibarnü Bihar chief minister Nitish Kumar-i taruba Rajya Sabha elections nung tokteptsü atema tenüing agütsüogo.

Nomination file asüdang JDU lenir Nitish Kumar den Union Home Minister Amit Shah aser JDU party nung lenirtem aika liasü.

Nitish Kumar-i Chief Minister menden toktsütsü telemtetba agiba sülen Rajya Sabha election nung tokteptsü atema nomination file asü.

Nitish Kumar-i X ajanga, pai mapang talangka nungi Bihar Legislative Assembly aser Parliament House anaprongla nung züingsem kümnüa liasü, ta ashi.

"Küm 20 dak tali nenoki kü dak tamang katetba aser yariba ajanga onoki Bihar aser nenok ajak kanga nendaka tenzüka aruogo," ta pai metetdaksü.

"Ni yimtenren nung ajemokba mapang nungi Bihar Legislative Assembly House anaprongla nung aser Parliament House anaprongla

nung züingsem kümnüa liasü. Iba tejangraba nungji ni tan election nung toktepa Rajya Sabha züingsem akümtsü tebilemba lir," ta pai metetdaksü.

"Tarutsü nunga nenok den kasa tesendaktep ayutsü aser Bihar terenlok atema ni maneni inyaktsü. Sorkar tasen akümtsü aser ni akokba tashi nungita yariba den külemi lenmang sayutsü," ta Kumar-isa metetdaksü.

Ita pezü tejaklen Nitish leniba nung National Democratic Alliance teloktepi Bihar assembly election nung takok tulu ngua liasü.

Tawa Kumar arrshi küm 75 jungogo. Yaküm November ita nung pai Chief Minister tenangzükba agia liasü aser taruba Rajya Sabha election nung pai tokteptsü.

Nitish-i Chief Minister menden toktsür, aser ibaji ajanga tang mezüing Bihar nung Bharatiya Janata Party nungi chief minister shimtsü atema maongka angur.

Bihar nung CM menden atema BJP-i Bihar deputy chief minister Samrat Choudhary mesüra Union minister Nityanand Rai shimtsüa akok ta bilemer.



TIR YIMYIM

YIMOBILEM (EDITRIAL)

DIMAPUR FRIDAY, FEBRUARY (METSUREMI) 06, 2026

Asenok dak mapetbatem

A or ka yimdong nung yi agi meseper mangazüa senzüa liasü saka tangari paji Aor-a ta meteta liaka Aor memesük ta jembibi. Kasaji, Aotsür ka yimti nung seplepa senzüya angu saka tangaribo lajia Aotsür memesük ta jembiba angashi. Iba amaji, office nung Aor tular kati ochimashi mapa inyak saka paja tangari dang masü saka külem inyakertemi dena Aor memesük ta jembitepa liasü. Itemji dang masü, Aor yimten yimsüsür kati mapa indanga meinyaktet aser o a junga mejembitet saka tangaribo paji Aor yimten lenir ama masü, Aor memesük ta jembibi. Arogo nunga, Aor sannüker ka dak tanela khuret kenyongi mali asü saka paji Aor-a ta metetsümonga tangaribo paji Aor memesük ta tenüngsena jembibi. Iba jagi Aotsür aser Aor dak mesüra Ao kin dak kechi agi apeter aser kechi agibo mapeter, kechi agi azür aser kechi agibo mazür, kechi jakla aser mapatem agi Aotsür Aor mesüker aser kechi jakla aser mapatem agibo Aotsür Aor memesüker ta asübaji kanga aroka shisadanga alitsübaji asenok ajak asoshi teinyaktsü mapa tongtibangtiba ka akümer. Aji oda, tula süoshia ajak ya nisungtem temang nembanga asemtsü asoshi yanglubatem lir, ajisüaka nisung shia asoshi tongtibangji temang nembangtetbaji dang masü saka indanger meindang, azü asü mazü mesüra apet mapet ta asübajia kanga tongtibang lir. Aji mesüka kin ka asoshia pei nübortemi beshiba aser inyakba mapatemji pei kin sobaliba aser tamangba yimsü dak apet mapet ta asübaji kanga tongtibang asütsü. Ibaji bilemdanga, tanü Nagaland nung asen Naga nunger kintem rongnung asenok Aotsür Aor dak apetba aser mapetba jakla yimya, sobalibatem aser mapatem ya kechisa asütsü ta shisadangtsübaji kanga tongtibang kümogo. Atangji, asenoki tangar dang tai atokba, temeim mapa inyakba, asen temang dang masü saka kiojen aser kima yimdong dena merüka ayuba, Tsüngrem meteta aliba, Tsüngrem nem tenla shitak agütsüba, achiajem nung azüoka aliba, tashi temetet aser ochishia aliba taküm, kibong, lokti, arogo aser yimtenji Aotsür Aor mesük aser Aotsür Aor dak petpeter tangari angur. Atangji, iba jagi Aotsür Aoertem yabo ajunga kanga tajung aser temeshi purtem asütsü amaika bilema asenoksasa asenok asanger amai angatetsü. Ajisüaka, Aotsür Aor ajakji yamaji tajung, teindang aser temeshi masü saka iba amaji Aotsür Aor alitsü merangtsübaji Aotsür Aor ajak asoshi teinyaktsü khuret lir. Aji oda, aseni asema tula süoshi agi asen dak azü-mazü aser apet mapetji asensasabo junga meshitetsü saka tangaribo kanga junga shitetsü. Iba amaji asen libaliro aser aseni inyakba mapatem agi asen dak azü-mazü aser apet mapetji tangari repranger aser parnokiang junga shiteter. Hau, asenok mapang - mapang shia tanela nung asentenshia sarasadema amongba agi Aotsür Aor tali mesüker saka ano lumia sarasadema mongli tiyazü jembibi, ochimashi mapa inyakli aser takok toktepa tashiyim amshili ta asüba agi ano Aotsür Aor tali-tali memesükba akümer. Kodang asenoki Aotsür Aor mesükdaktsüba sobaliba aser libaliro tajungtem indangji bilemdangdir, itemji Tsüngremi asenok tsüraburtem mapa ajanga moatsüba asen senmangtem lir. Aji oda, Tsüngremibo asenok ya tajung aser teindang nisungtem südaktsüner, ajisüaka asenok aikati yamaji alitsübaji temerangdanga memeranger. Aotsür Aor agi Aotsür Aor memesük akümbaji yang nung jagi tenzüker. Asenoki nütsüng aika aginer, takar aser tular kümner saka asenoki aginübaji Tsüngrem dang meshitsü melen asenoki tiyazü agi taila nütsüng aika bendentsü meranger aser takar tular aser yimsüsür akümstü meranger, iba jagi asenok tali-tali Aotsür Aor memesük akümer. Aji oda, tiyazü nütsüng bendenba agi shitakba nung marener, taila rongsen asüba agi asenoki repranga lia asen ket nungi samar aser taila nisung asüba agi arogo, lokti aser yimten nunga shitakba nisungi aniba ama maniteter. Atangji, asenok shitakba Aotsür Aor mesüka alitsübaji temela masü saka Aotsür Aortem ya alima nung mapa temela-temela shima inyaktsü asoshi yokba nisungtem masü saka mapa tasak aser tulu inyaktsü asoshi tashi aser shisatsü tulu agütsüba purtem lir, iba yariji asenok taa aser temoatsüa lir. Atangji, Tsüngrem memetet, mazüok, ochimashi aser tashiyim mapatem agi nümadangdanga alibaji Aotsür Aor dak mapet ta asenoki angatet meshiogo.

OLEMSABANG

LIRLAMALI - MOABAMELIAKALIR

~ Temjenmomgla

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Putu sa putu suiyer, tsüngsang mopung tajung aliba mapang ka nung, tenem kolak ka nung yimti ka liasu. Iba yimti nung kibong temji, temeyong agi zungdangteta, oda, kibong tulu ka amai dang lia arua liasu.

Idakji, yim lenmang tatempang aser alu lenmang tetenzükba yongtsü nung otsüla Lirla, shiba küm nung teintet liasu, tanübo, ashiko kum noklang suyira alitsü sudi. Joko lar jala ka dang aliba bendanger kaden lembuba ajanga, la par yimtsüng nung tsürabur malir jaboso ka anioker ali. Aser jabaso tenüngji Moaba liasu.

Otsüla Lirlai anogo shia sayutsüngi tajung agutsüa, anebalua lia aru. Kodang jabaso Moaba, tain akum, yimti nung dangar ajak dang nungi alakteta shisa taka aser inyaksangshi tashi, aser aso ajen surubangro tajung, ajaki tenuk sünga, tetemsü teindang jabaso ka akum. Aser otsüla Lirla, o ka danga mezütoki, Moabai tashi anga. Anogoshia otsüla Lirlai, Moaba dang ajemalua kumdanga, azüoka tashi anaga alitsü, shi-jen shia arü aser tena kanga meimteba ali.

Otsüla Lirlai, Moaba dang ashi, "Moaba, kumdanga inyaksangshiangma no." ta Otsulai Moaba dang teti sayubentsü o agutsü.

Saka yamaji tena tesenep nung lia aruba mapang ka nung, Moaba memetetba nisung kar ajuru aser iba nisung jagi Moaba dang ashi, awatsüng ka nung ango (fish) moloktetet {basket(big fish)} lir.

AjisurMoabai, anogo ishika lir, ita asem tashi jenjang tajungba bushia pa den aotsü lemtet. Yimer yimsanger temi, molok sunga chiyungtsü-sobutsü pententsü aser pa dang tekumdangtsü-tajungshi o aika shir yok. Kechiaser alima talang memetetba jaka yim atentsü asu nungji aikati na mao nung dang tajungba asutsü masü no? Saka Moabai nebur temi ashiba o ajak nung temeim dang ajitet. Aser pai yimti nung alir nebur tem dang mepeshia ashi, otsüla Lirla ni maru tashi otsüla anepalua liang ta mepeshi. Pai jen sunga tsük aser tachitsü sungjang lijang sunga yutsür menungraseta yimtiiji doktsü. Kechiyong otsüla Lirla mapa inyaktsüsa temang aki joko memela.

Asükwa suier lemyeiwa mapang tonga aru saka jabosu Moaba meyiba meshilang aser pa osang a kecha mali, yimertemi otsüla Lirla-er ki ji kodang-a azünga medoktsü. La shisabulo ajak lemsateba pelateba yimjong nung ali.

Yamaji aliba mapang ka nung, yimer taintem alu achi-i ayipi oer aser tetsür tanurtem yipden nung pei jala jabaso anir mejiangba mapang ka nung, otsüla Lirlai par kishi nung tekolak nungi shir tetsüng tashi kodanga mongodangba nisung ka tetsunga ajak su agi meyipanger, soputsu balaka sobur nisung ka aruya angu, aser la tsüboa, anasa aliba sung ka amer nokdak.

Aser nisungbajagi ashi, "Otsü, otsü, ni meyipa shilangerago, ni anema lir, otsü, otsü" ta shia kikhum telung jagi ait.

Otsulai langzu-a nisung ba dangji ashi, "Moaba, otsüla anema lirko, ku jabaso Moaba ni yangi lir" ta shia ajeb tenzuk. Tena azuteper ano kulemi ajeb, idangji Moabai pa yangko nungi oset ka akitet koba tanu asunoki bottle ta ajar iba ama ka agizuk aser aguja ashi,

"Otsü iba sempet ya ne nem bentsüba, koba amang agi tesangwa kumdaktsür, tesungmangtsü oset ka bener aruja lir. Kechiyong ya kanga nungdakba, anungji yimer atema ni or tanaben arudang pener arutsü anungji ni maro tashi, nai ya kumdanga amshia liang nuh.

Aser ano Moabai tanaben, ba yangku nungi, ano sung tila ana (metsüktsü) pener arua, iba bottle telung nung, shimu nung sungzu ka enoker, charak milen ka, koba par yimti nung kodanga nibutemi mamshiba, koba tzüyim nung angopurtemi aonung ango apu dang amshiaba milenka liasü.


Pai milenji au (bamboo) indang menden(bench) nung ayu, aser idakji mi tsüloktsü asoshi metsüktsü ka pa yangku nungi akitet aser pai milen nungji tsükloktsü lia, otsüla Lirlai, Moaba dak tekolak nung amah aser rara-a ashi, "Meduba ya tzüyim masu, tzü masu, sung taru nungji ayubaji, ki arungtsü tasa tadong no. Ojang porapujiang aser mejang ti, arung menuogo..."

Aser Moabai ashi, "Otsü, otsü, ajiang, ni taonung sayubayaki nü takum melenshitsütsü, achiang" Taka nung pai, sungzü kechi temo nung remer liasu, idakji mi senlok aser, tesangwa jagi, ki anungdang ama akum.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yirusalemnung Yisu jajaba lenmang 'Jerusalem road' lapoktsüogo



'Jerusalem Road'

March 05, 2026: Küm 2,000 tejaklen Yisu Khrista alima nung aliba mapang Pa jajaba lenmang 'Jerusalem road' lapoktsüogo; tesüiba küm 20 tashi ali tua bushisüngdangba sülen tang iba lenmang public atema lapoktsür.

'Pilgrimage Road' ta ajaba lenmang ya Dawid yimti nung tongti lenmang liasü. Iba lenmang ajanga Silom tzübo aser Temple Mount na sendakteper. Iba lenmang ya metre 600 shi talang aser lenden tasazükji metre 8 lir. Tesüiba putu aika süia arudang iba lenmang ya tangbo ali telung nung ang lir aser temalen kiojen süa lir.

"Pilgrimage road" ya akhidang Herod Chuba mesüra Pontius Pilate tetuyuba nung yangluba lenmang liasü ta bilemer.

Archaeologist temi küm 20 shi iba lenmang nung ali tua bushisüngdanga liasü. Iba lenmang ya tangbo Palestine nung nütüüng teimba aliba kiyong ka telung nung lir.

Kasa tesem nungjisa Yihuda nung külemküja dak sendakba nung tzü chigoba tesem aser sabang kata liasü.

Ali tua bushisüngdangba mapang nung akhidang shishilembaba tesem ka ngutet, Rome nung kilentzü aodak aser Second Temple mapang amshiba oset aika ngutetogo.

Dawid yimti nungi Annaelle Choukroun-i, "Rome yimli mapang nung iba lenmang ya Herod Chubai 20BC nung yanglu. Akhidang lokti tzü chigoba tesem tulutibaji ibai liasü. Nisungtemi Silom tzübo nungji merükteta tzü chigoba sülen iba lenmang ajanga tekülem kidangi oa liasü," ta metetdaksü.

Akhidang temeket nung aliba yimtsüngtem nungi temeshi ainlen jajartemi iba tzübo nung tzü chigoba sülen tekülem kidangi oa liasü.

Archaeologist temi iba lenmang alibaji memeteti liasü, ajisüaka 2004 küm luli (pipe) ka pokdang aser ibaji melentsü atema inyakba mapang nung

tzübo telungi aiba jenjang (steps) alibaji nguteta liasü.

Ali tua bushisüngdangba mapang nung archaeologist temi Yisu alima nung aliba mapang nung amshiba senjang aika ngutetogo, aser item rongnung 'shekel' tesadang kata densema liasü. Iba lenmang nungjisa seret odangba oset aser lung-a nguteta liasü, aser ibaji ajanga iba lenmang nungji shishilembaba tesem-a liasü ta bilemer.

Annaelle Choukroun-i, "Iba ya Khristantem atema kanga tongtibang, kechiyong Yisu Khristai jajaba lenmang nung parnokia jajartettsüsa maongka angur. Yihuda nungertem atema-a iba lenmang ya tongtibang, küm 2000 tejaklen ozü otsüla-oboula nungertemi jajaba lenmang nung jajatsü atema onoki maongka angur. Iba ya temoatsü tuluka lir," ta ashi.

'Pilgrimage Road' ya City of David National Park shilem ka lir.

Bihar nunga anti-conversion ozüng ka benoktsü atema jembidar

March 05, 2026: Tawa Bihar state sorkari, tanga state tem nung benokba ama state nunga anti conversion ozüng ka benoktsü atema tebilemba lir; nungdak dang süra Bihar nunga anti conversion ozüng benoktsü, ta metetdaksüogo.

Iba osang ya State Legislative Assembly nung Speaker Prem Kumar-i metetdakja liasü.

NDA nungi MLA 18-i benokba "Calling Attention Motion" nung ajemdaker o entepba mapang nung Speaker-i iba osang ya metetdakja liasü.

NDA nungi MLA 18 rongnung Maithili Thakur, Mithilesh Tiwari, Janak Singh, Sanjay Kumar Singh aser Baidyanath Prasad nung densema liasü. Parnoki Uttar Pradesh, Madhya Pradesh, Uttarakhand aser Gujarat state tem nung benoka aliba ama state nunga anti conversion ozüng ka benoktsü

nungdak, ta takhangba agütsü.

Bihar tesem kar nungbo Dalit nung aikati Khristan yimsü agizükogo, anungji iba atemaji legislative ozüng ka benoka inyaksü nungdaker, ta parnoki ashi.

MLA Tiwari-i, Buxar district nungbo Dalit nung kibong 1,000 dak temai Khristan yimsü agizükogo, ta metetdakja liasü.

Tiwari-isa, "Uttar Pradesh nung anti-conversion ozüng tesashi benoka lir, yamaji Bihar nunga benoktsü nungdak. Seemanchal region nunga aikati Khristan yimsü agizükogo, anungji iba ozüng ya Bihar nunga nungdaker. State sorkari iba ya reprangshitsüla," ta metetdaksü.

MLA Anil Singh aser Sanjay Kumar Singh nungeria state nung Arogo kanga renlokba metetdaksüba den külemi Khristantemi mesüzüka nisung aika Khristan yimsü dangi

meyipdaksür, ta metetdaksü.

Anil Singh-i, "Tang India nung Khristan nütüüng arenbaji shilem 15.52 shi lir, saka Bihar nungbo shilem 143.23 shi arener," ta metetdaksü.

Ajisüaka Bihar Tourism and Arts & Culture Minister Arun Shankar Prasad-ibo, yimsü meyipba dak sendakba ozüng benoktsü atema sorkar tebilemba mali, ta shiogo.

2022 küm June ita nung Bihar Chief Minister Nitish Kumar-i, Bihar nungbo anti-conversion ozüng menungdaker, kechiyong yangibo yimsü balala amangertem ajak tesünep nung alir, ta metetdakja liasü.

Tang India nung anti-conversion ozüng benoka aliba state 12 ji Uttar Pradesh, Odisha, Arunachal Pradesh, Chhattisgarh, Gujarat, Haryana, Karnataka, Jharkhand, Uttarakhand, Madhya Pradesh, Himachal Pradesh aser Rajasthan lir.

ANOGO ABEN TSÜNGREM DEN

Temeimi tashi angaba bener arur

Shiba den kü ozüng lir, aser aji benshir pai ni meimer: aser shibai ni meimer kübui pa meimtsü, aser ni pa meimtsü aser ni küsasa pa dangi jungkai adoka sayutsü.

Yohan 14:21

Tsüngrem ozüng meimbaji ne mulungjang nungi adoker. Kodang nai Tsüngrem dang tashi angatsü timtemdir, ibaji ne mulungjang Tsüngrem nungi pilaba tamaitsü lir. Kari ashir: "Ni Tsüngrem meimer, saka dang tashi angatsü timatemer." Tanelaren ibaji tamakoktsü. Kari ne dang "Nai Tsüngrem meimer asü?" ta asüngdangra nai yakta langzüttsü, "Au ni meimer." Ne dang, "Nai Tsüngrem dang tashi angadir ma?" Nai au ni tashi angar ta langzüttsü asü? Temeja Tsüngrem meimbaji temulungjang ajunga agi Tsüngrem dang tashi angaba dangi anir. Nai nübuttsü dang mapang mapang nung meimra, ne tesendaktepji shidak masü. Tesadang meimba aser tesadang tashi angaba Tsüngremi magizüker.

Temeimmedeni tashi angabaji ozüng mapa lir. Pei atema dang tashi angabaji pei sasa tabensa akümba, koba agi asüküm dangi anir. Tekümdang Khristantemi Khrista dang tashi angaba dang nungi parnok taküm nung tazüokba akatsü meranger. Tazüokba jagi Tsüngrem meimba mendenji agitsü makok. Tsüngrem ne temang meshia aliba, ne moral libaliro aser na arogo mapa nung shilem agiba atena oa ne mulungjang repranger.

Ne tekülem tazüngla aser mapang ataktetta ayuba tekülem ka dang akümer asü? Tsüngrem O azüngba metetta arur asü? Ne sarasadem waluk watemba ka dang akümer asü? Idakji ne mulungjang Tsüngrem nungi melenshiba tamaitsü lir. Temeimji Tsüngrem den telungjem akatsü aser Pa tenzüktsü asoshi jangradaktsüba tulutiba lir.

Chhattisgarh nung Khristan kibong ka dak azük aser kidang nungi meindok

March 5, 2026: Chhattisgarh state nung Khristan kibong kati Khristan yimsü toktsütsü memelungba agi Hindu nung telok kati azük.

February 26, 2026 nü Chhattisgarh nung Bijapur district kübok Erramangi yimdak lokti jagi Khristan kibong dak azükba sülen kidang nungi meindok.

Hindu yimsü alia amanger 200-i kiji longbang aser Ram Sai'er kibong züngsem ajak dang Khristan yimsü toktsür tang Hindu yimsü dangi meyipang ta shia amokmerena liasü.

Tesüsa lokti jagi ki kakkoker atuba sülen osettsüset den chiyungtsü ajak lenmang nung agizüktsü aser kiji bendokja liasü.

Ajioda süaka Ram Sai'er kibongi Khristan yimsü toktsütsü memelung.

Ram Sai-i, "Tesüiba küm ana tashi ozü kibong amokmerena aruogo. Yamaji timtemjenti liaka onoki yimdak Khristan yimsü anemertem dang, onoki Khristan yimsü metoktsütsü ta ashi. Yasüngbo kü kinüngtsü küna den tanur

trokprongla moapu nung mejanga liasü. Tang tashi Tsüngremi onok tasü itdaksür. Tsüngremi onok nem maneni tashi agütsütsü, aser ibaji onok tamang," ta metetdaksü.

Chhattisgarh nung mapang shia yimtsüngtem nungi Khristantem meindoker aser yimdak Khristantem tasü mang aremstü memelar.

AO OSHI ANGAZÜKDAK:

TANÜ ANGAZÜKTSÜBA OJANG



Ulushi

(v) tuluba küma yanglushi (made bigger)

* Lenmang tila asüba agi ulushia yanglu.

Unger

(n) yimtsüng nung tokolakba (head of a village)

* Yimtak unger kidang tatartem senden amen.

OLONG PAITEP # 7434

16x16 crossword grid with numbers 1-16 indicating starting positions.

TIPIEN

- 2. Auonungchiyongsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A _ _ _ g
6. Mopung apodoka
9. Tonglipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 7433 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.

NAI-A YA METETTER



Assam kübok Goalpara nungi nature photographer Bidyut Kalita-i Spain nung 36th Memorial María Luisa International Mountain, Nature and Adventure Photography Contest nung Macro Category kokogo. Taküm iba tetoktepba nung linük 78 nungi photograph 18,059-i shilem agia liasü. Pai tangokba noksa ya potter wasp ka teyimdak nung tangokba lir, koba pai "The Flying Engineer" ta nungja agüja liasü.

Assam: Jogen Mohan, Terash Gowala, Pramod Boro nunger Rajya Sabha atema nominations file süogo



United People's Party Liberal (UPPL) lenir Pramod Boro Nomination file asü dang tangokba noksa nung angur.

Guwahati, Metsüremi/March 5 (Agencies):

Assam nung tang sorkar kümteter aliba National Democratic Alliance (NDA) nungi candidate tem Rajya Sabha atema Brehostibarnü nomination file süogo, ta ketdangsürtemi metetdaksü.

Candidate tem rongnung Bharatiya Janata Party nungi Jogen Mohan aser Terash Gowala na aser United People's Party Liberal (UPPL) lenir Pramod Boro nunger densema lir. Parnoki Union Minister Sarbananda Sonowal matsü dang Assam Legislative Assembly nung nomination paper file süa liasü.

Opposition temi tang tashi candidate ka danga nominate süa mali aser assembly nunga parnok tashi ajema lir asünung

NDA nominees asem ya tetokteper melei shimtsü imlar.

Assam nung Rajya Sabha election ya BJP lenir Bhubaneswar Kalita aser Rameswar Teli na aser Independent züngsem Ajit Kumar Bhuyan nunger melena shimtsü asoshi agitsü lir. Parnok asem term ya April 9 nü tembangtsü. Jogen Mohan, shiba Mahmora Assembly constituency nungi lir, pa tang Assam indang Transport, Hill Area Development, and Indigenous and Tribal Faith and Culture atema Cabinet Minister lir.

Duliajan nungi BJP MLA Terash Gowala ya nomination paper agütsütsü atema Assembly complex-i bicycle ka nung mener arua liasü.

Pramod Boro, shiba taoba mapang Bodoland Territorial Council (BTC), Chief Executive Member liasü, pa ya shimra UPPL nungi Rajya Sabha-i aoba tanabuba lenir asütsü.

Tang Upper House nung Assam nungi Union Minister Pabitra Margherita aser Kanad Purkayastha (BJP), Birendra Prasad Baishya (Asom Gana Parishad) aser UPPL nungi Rwngra Narzary nunger lir.

Assam Legislative Assembly nung züngsem 126 nungi BJP MLA 64 lir aser parnok den sendaktepa aliba AGP nungi teku, UPPL nungi tenet aser Bodoland People's Front (BPF) nungi asem lir.

Opposition nungi Congress MLA 26, All India United Democratic Front (AIUDF) 15, CPI(M) Independent kaka lir.

Assam: BJP-i menden 90 atema candidate shimogo

Guwahati, Metsüremi/March 5 (Agencies): Assam Chief Minister Himanta Biswa Sarma-i Brehostibarnü ashiba agi, Bharatiya Janata Party (BJP)-i constituency 90 shi atema candidate tem indang list tembanga yangludat.

BJP indang state headquarters nung senden amenba sülen osangbenertem den sensaksemba mapang Sarma-i, menden timba ka atema party yongtsü nung sensaksem tembangogo, ta ashi.

Paisa, BJP-i candidate tem mezü ngbuba list March 10 aser March 12 tsü ngda sangdongtsü

imlar, ta ashi. Chief Minister-i ashiba agi, menden lemdangtsü atema alliance partner tem den yakta jembishinütsü. BJP-i Asom Gana Parishad (AGP) aser Bodoland People's Front (BPF) den telemtetba magi aliba mendentem atema sensak asemstü, ta pai ashi.

Party headquarter nung senden amenba mapang constituency tem nung tensa aser candidate tem asadanga liasü. Election atema inyakyim tenzü ktsü mapang anasabai aruba mapang party-i renmshi tenzü kogo aser parnok den

sendaktepa aliba party tem den tongtepratepa inyakkdar.

Kasa mapang nung Sarma-i Sivasagar MLA aser Raijor Dal lenir Akhil Gogoi aija ashiba agi, pai jembiba olen ya langzütsü kangabo nungdak madoker, kechiyong pai yimden yimsüsüba tsütsü ken o balala nung pa tamendakdak meleshia dang alir.

Gogoi-i, Raijor Dal nungi taruba election nung tokteptsü jangrartemi pa den March 5 nü Kaziranga National Orchid Park nung 11 ako nungi 3 ako tashi nung ajuruteptetsü ta shiogo.

Manipur nung sen crore 4.1 alang temesepba mozü apu

Imphal, Metsüremi/March 5 (Agencies): Manipur Police anti-narcotic task force aser central security force tem longjemer Tengnoupal district nung Bodhbarnü temesepba mozü shibelener ka apu aser sen crore 4.1 alang temesepba mozü ngutetogo.

Ketdangsürtemi ashiba agi, itdangitertem nungi arrtsü adener Myanmar nungi temesepba mozü shibelener aruba osang tejangja ka angazükba sülen meita aoba sentong ya benoka liasü. Iba nisungba ya Tengnoupal police

station kübok naka check post ka nung pua liasü.

Meita aoba mapang sepaitem yagi Mahindra Thar ka sota bushisü ngdangba sülen parnoki World is Yours (WY) sü ngjang seret 2.33 aser brown sugar seret 0.592 nguteta liasü.

Police-i ashiba agi, brown sugar ya soap case 16 nung miima bener liasü aser WY sü ngjang ya plastic talep pezü nung miima bener liasü. Sepaitemisa mobile phone ka, Aadhaar card ka aser gari indang registration certificate (RC) pua yuogo.

Security dak sendakba nung temesepba mozü bena alisang maitsü ya memetetdaksü lir.

Narcotics Control Bureau (NCB)-i ashiba agi, shishilembadak WY methamphetamine jenjang ya seret nung crore 2 nungi 5 tsü ngda meshir.

Maneni temesepba mozü ya kong nungi bener aser koloni bener aoer aser Indo-Myanmar arrtsü ajanga shibelener tem sendaktep kecha ali mali aji jangjatsü atema bushisü ngdang tenzü kogo, ta police-i ashi.

Kim-i repranga North Korea indang cruise missile tendang

Pyongyang, Metsüremi/ March 05 (Agencies): North Korea lenir Kim Jong Un-i repranga lia 5,000-tonne naval destroyer tasen ka nungi "strategic cruise missiles" tendanga liasü, ta state media ajanga ashi.

Bodhbarnü Choe Hyon nungi sea-to-surface missiles tendangba Kim-i repranga liasü, koba warship tasenba indang tashi nung 'element' tongtipang ka lir ta ashir aser ibai par linük atema sea defence indang maitsü tasen ka ta ashi.

Kim-i iba mesük mesüra tajungba warship tali yanglutsü ayongzük aser par tzüyüm sepaitemi nuclear nok-nü amshiba nung terenlok lir ta ashi.

"Asen Navy indang forces temi tzüyüm telung aser tema nungi amakba kanga kera aintsü. Navy nem nuclear nok-nü agütsüba nung temulung süa terenlok lir," ta Kim-i linük antiolen Nampo Shipyard nungi ashi, ta North Korea indang official Korean Central News Agency (KCNA) ajanga shi.

"Item takok ya asen maritime sovereignty kumzuka ayuba nung temelenshi tulu, koba asenoki century tesadang ka takok monguteti liasü," ta pai ashi.

South Korea indang Yonhap

news agency ajanga ashiba agi, North Korea-i nuclear amshitetsüba nung "strategic" nok-nü ta amshir.

Kim-i Mongulbar aser Bodhbarnü Choe Hyon semdang, kong 5,000-tonne "Choe Hyon-class" destroyers series tasenba ka tang teyangludak lir, ta KCNA ajanga ashi.

May 2025 nung North Korea indang naval modernisation programme mangdang nung timtem tulu ajurua tanabuba Choe Hyon-class destroyer ka Chongjin Shipyard nung sayadang makepoka liasü.

Mapang tatsüka lir tamakok ajuruba indang nangzuka, launch mechanism ka mapa shidak meinyakba yong 5,000-tonne destroyer ya anojungi tzi nung ajok, ta KCNA-i shia liasü.

Iba mapang Kim-i iba tamakok ya mapa tamajung inyakba ama ashi aser state institutions balalai mekumdangba aser shidak meinyakba ajanga lir ta tenung sena liasü.

Küm pongu nung khen amenba Workers' Party mungdang February ita tatemlen tenzükdang North Korea leniri nüburtem libaliru jenjang ajungkettsü nangzükba

sülen iba missile ya tendanger alitsü.

Ruling party ya rongsenketzüng tashi itshtitsü aser nüburtem libaliru jenjang ajungkettsü asoshi otsüsütsü mapa tulu ajurua lir, ta Kim-i iba mungdang nung shia liasü.

"Yangji asenok mapang tatsükata ajem-ajema melie tali yakyaka aser tanen makai tim a t e m t s ü nungdaker," ta pai ashi.

Ajak yutsür North Korea-i nuclear nok-nü yangluba aser mitkar tashi nung temulung agütsür, aser United States aser par tembar South Korea nungi nungshiba nokdangtetsüsa mitkar tashi tait alitsüla ta ashir.

2011 küm t a t e m l e n y i m s ü s ü b a mendeni aruba sülen Kim-i mitkar nung temulung agütsü aser kasa m a p a n g rongsenketzüng nunga tenük yoker.

Israel aser US nati tashiyim amshiba den kasa tokteptsü: Hezbollah

Beirut, Metsüremi/March 05 (Agencies): Israel aser America nungeri tashiyim amshiba nung Hezbollah-i kasa tokteptsü aser tashi balala süaka bendanga magütsütsü, ta Lebanon nung Iran-i yariba telok nung tekolakba Naim Qassem-i Bodhbar aonung television ajanga ashi.

"Asenoki tashiyim amshiba ajangshia lir... asenoki inyaktsü ajak agi tematiba nung bendanga magütsü tashi kasa tokteptsü, aser asenoki bendanga magütsütsü," ta Hezbollah leniri sangdong, koba parnoki Israel tsütsüi Hombarnü rockets khalokja aser Israel-i Lebanon nung bomb pokloktsü tenzük Qassem asoshi ibai mezüngbuba sangdong alitsü.

Par teloki tang rara ya tenzük ta aikati angateta aliba Qassem-i aitsü aser "Rocket khaloktsüba sülen Israel-i inyakba ya telangzüba masü. Ibai tashiyim amshiba lir, koba jelia renema liasü," ta ashi.

"Israel aser America nungeri tashiyim amshiba nung Hezbollah aser Islamic resistance ajanga telangzüba agütsür aser ibai tejangja temeden... Asenok asoshi ibai 'existential defence' lir." West Asia rara ya

Hombarnü (March 2, 2026) Lebanon tongogo, aser mapang tatsüka lir Israel-i par sepaitem Lebanon south tsütsü jila aser yimtsüngtemi yiogo ta ashi.

Israel-i amakba nung nisung 72 tepsetogo aser nisung 83,000 dak tema tesem balala nung jenshia lir, ta Lebanon ketdangsür temi Bodhbarnü ashi.

Hombarnü Lebanon sorkari Hezbollah indang mitkar inyakyim tangsa nokdang ta sangdong aser par nok-nü bendanga agüjang ta akhang, saka Hezbollah-i magizüker.

Qassem-i Bodhbarnü jembidang Lebanon sorkari telemtetba tasen agiba aitsü aser "Lebanese sorkari Israel aser America nungeri tashiyim amshiba aija kasa tokteptsü lenmang bushitsü melen parnoki aibelena inyakba abensatsü atema resistance anema nokdak aser Israel-i akhangba den lirumedema inyaker," ta ashi.

"Resistance aser resistance indang nok-nü onük ya shinga atema mesüra shinga dena mangatettep aliba indang masü. Onoki Lebanon nung asen nübur, asen chir tarutsü atema aser asen linük kumzuka ayutsü asoshi rarar," ta pai ashi.

योजना तथा वास्तुकला विद्यालय, विजयवाड़ा
School of Planning and Architecture, Vijayawada
An Institute of National Importance, Ministry of Education, Govt. of India
Survey No.4/4, ITI Road, Vijayawada - 520 008, AP, India.

No.01/SPAV/Acad./JAAP PG -2026 Date:02-03-2026

ADVERTISEMENT FOR Joint Admission for Architecture and Planning-Post Graduate (JAAP PG) 2026

SPA Vijayawada announces Admissions to Master's Degree in Architecture, Planning, Building Engineering & Management and Design through Joint Admission for Architecture and Planning-Post Graduate (JAAP PG) 2026 for the Academic Year 2026-27.

For further details of registration and admission process, please visit our website www.spav.ac.in and <https://jaappg.admissions.nic.in/>
Opening of Registration under JAAP PG 2026 on JAAP PG 2026 Portal - 02.03.2026
Closing of Registration under JAAP PG 2026 on JAAP PG 2026 Portal - 22.03.2026
Sd/- Registrar

क्षेत्रीय शिक्षा संस्थान, भुवनेश्वर
REGIONAL INSTITUTE OF EDUCATION, BHUBANESWAR

(राष्ट्रीय शैक्षिक अनुसंधान और प्रशिक्षण परिषद्)
(National Council of Educational Research & Training)
सचिवालय मार्ग, भुवनेश्वर-751022/Sachivalaya Marg, Bhubaneswar - 751022

Advt. No: 539 Date: 03.03.2026

प्रवेश घोषणा/ADMISSION ANNOUNCEMENT

क्षेत्रीय शिक्षा संस्थान, राष्ट्रीय शैक्षिक अनुसंधान और प्रशिक्षण परिषद् भुवनेश्वर ने घोषणा की है कि चार वर्षीय एकीकृत शिक्षक शिक्षा कार्यक्रम (आई.टी.ई.पी) में प्रवेश राष्ट्रीय परीक्षा एजेंसी (एन.टी.ए) द्वारा आयोजित राष्ट्रीय सामान्य प्रवेश परीक्षा (एन.सी.ई.टी) 2026 के माध्यम से किया जाएगा।

Regional Institute of Education, NCERT Bhubaneswar announced that admission into the 4-Year Integrated Teacher Education Programme (ITEP) will be conducted through National Common Entrance Test (NCET) 2026, organised by the National Testing Agency(NTA).

Apply Online: 12th February - 10th March 2026
Exam Date (Tentative): 17th April 2026 (CBT Mode)
Students can apply at: <https://exams.nta.nic.in/ncet>

वर्ष 2026-27 के शैक्षणिक सत्र से, क्षेत्रीय शिक्षा संस्थान भुवनेश्वर के आई.टी.ई.पी में प्रवेश पूरी तरह से एन.सी.ई.टी प्रतिशत अंकों के आधार पर होगा। यह कार्यक्रम सक्षम अधिकारियों द्वारा निर्धारित मानदंडों और दिशानिर्देशों के अनुसार संचालित किया जाएगा।

From the academic session 2026-27 onwards, admissions to the ITEP of Regional Institute of Education Bhubaneswar will be based strictly on NCET percentile scores. The programme will be offered in accordance with the norms and guidelines prescribed by the competent authorities.

2 वर्षीय बी.एड. और 2 वर्षीय एम.एड. में प्रवेश राष्ट्रीय शैक्षिक अनुसंधान और प्रशिक्षण परिषद्(एन.सी.ई.आर.टी) सामान्य प्रवेश परीक्षा(सी.ई.ई)-2026 प्रक्रिया के माध्यम से जारी रहेगा, जिसका संचालन क्षेत्रीय शिक्षा संस्थान, एनसीईआरटी, भुवनेश्वर द्वारा किया जाता है।

Admissions for 2 Year B.Ed. and 2 Year M.Ed. will continue through the NCERT Common Entrance Examination (CEE)-2026 process conducted by the Regional Institute of Education, NCERT, Bhubaneswar.

प्राचार्य/PRINCIPAL

MULUNGNEN O

Onoki teti meima aliba adianu, **Wb. L. Imli Ozukum** (Mongsenyimti) alima nungi pilar onok mangyimba mapang nung kinüngertem, medemertem, kiyongertem, Arogopurtem aser lokti balala nungi aikati onok dang temeim sayua nübo, sarasadem, rongsen, shisatsü aser yimya balala agi yariba ajanga onok nem tashi tasen agütsüogo. Nenok ajak dang kangasa pelar. Asen Tajungsang Tsüngremi nenok kija-kibongtem tali moajngma.

Item kija aser telok dang alakteta pelaba lemsateper.

1. Dimapur Ao Baptist Arogo
2. Dimapur Mongsenyimti Senso Telongjem
3. Dimapur Mongsenyimti Tamang Telongjem
4. Dimapur Mongsenyimti Tsür Telongjem
5. Mongsenyimti Maongtemjen Zünga Dimapur
6. Shri lmkongmar Longkumer Advisor - Sericulture & Minority affairs (Govt of Nagaland).
7. Shri Tongpang Ozukum Advisor- Water Resources (Govt of Nagaland).
8. 35 Assam Rifles
9. 35 Assam Rifles Aoer Telongjem
10. 35 Assam Rifles Unit Church
11. Little Star Hr. Sec School & Star Kids
12. Fellowship Nursing Home, Dimapur
13. Eden Medical Centre, Dimapur

~ Temeim kinüngtsü, chirnurtem aser kinüngertem.

Aso: 22/02/1981 - Asü: 25/02/2026

POTENTIA RESIDENTIAL

"Exclusively For NEET Aspirants"

NEET 2026 CRASH COURSE Classes start from **6th March 2026**

- * COMPLETE REVISION - PHYSICS, CHEMISTRY & BIOLOGY
- * MOCK TESTS & EXAM-FOCUSED PRACTICE
- * EXPERT FACULTY & PERSONAL MENTORING
- * PEACEFUL RESIDENTIAL STUDY ENVIRONMENT

17th years of Consistent Neet Result

9862032828
7005657885

Khadiruzha Ward 1
Chumoukiedima

ADMISSION OPEN

Premier League: Arsenal-i parnok jenjang yanglushiogo

Metsüremi/March 5, 2026 (Agencies): Arsenal F.C-i Premier League nung temaba jenjang nung parnok jenjang yanglushiogo. Bodhbarnü Brighton & Hove Albion goal 1-0 agi akokba sülen parnok jenjang junga kümogo.

Kasa mapang nung tanabuba jenjang nung aliba Manchester City team Nottingham Forest den goal 2-2 agütsür draw asüba sülen parnok point ana akoksaogo.

2004 küm sülen tang mezüngbuba title abentsü timla ka-a Arsenal-i kanga junga asaya arudar, saka parnok ya Pep Guardiola-i aniba team yagi kanga meranga arishidar.

Asaya nung Arsenal atema Bukayo Saka-i minute 9buba nung goal ka idaktsü, koba pa atema Arsenal nungi asaya 300buba liasü.

Brighton puri ball timba amshia asaya aser goal idaktsütsü asoshia maongka aika nguteta asaya saka Arsenal-i kanga junga defend

asü aser goal ka yagi asaya koka liasü.

Tanabuba jenjang nung aliba Manchester City, shirnok asaya ka agi tajemba asayar lir, parnok Premier League table nung temaba jenjangi atutsü atema meranga asayadar parnok Nottingham Forest puri sota goal 2-2 agütsür asaya tembanga liasü.

City nungi asayar Antoine Semenyo-i mezüngbuba goal idaktsü. Ajisüaka Forest nungi asayar Morgan Gibbs-i minute 56buba nung goal ka idakja goal kasasa aküm.

Iba sülen minute trok lir Rodri-i City atema tanabuba goal idakja parnok maneni tejakdang aküm.

Ajisüaka Forest-i maneni meranga asaya-a parnok rongnungi midfielder Elliot Anderson-i goal tajung ka idakja goal 2-2 ta kasasa aküm.

Bodhbarnüsa Michael Carrick lenisüba nung Manchester United pur mezüngbuba tamakok nguogo.

Parnoki St James' Park nung Newcastle United mekoki liasü.

Asaya nung Newcastle nungi asayar Jacob Ramsey red card achiba sülen parnok asayar 10 agi dang asaya tembanga liasü.

Asayar ka ajema liaka Newcastle-i Anthony Gordon ajanga mezüngbuba goal idaktsü, ajisüaka asaya mezüngbuba shilem atemtsü lia Casemiro-i goal ka idakja kasasa aküm.

Asaya tanabuba shilem nung Newcastle goalkeeper Aaron Ramsdale-i ball aika nokdanga liasü. Iba sülen asaya tatemtsü lia substitute William Osula-i minute 90buba nung Newcastle atema tanabuba goal idakja parnok asaya akok.

Premier League nungsa Chelsea-i goal 4-1 agi Aston Villa kokogo. Parnok rongnungi Joao Pedro-i goal asem idaktsü.

Maneni West Ham United-i goal 1-0 agi Fulham koka liasü. Goal ka ya Crysencio Summerville-i idaktsü.

Rashid melen Afghanistan captain tasen shimogo



Ibrahim Zadrán

Metsüremi/March 5, 2026 (Agencies): Sri Lanka national cricket team den taruba white-ball asayamung atema Afghanistan national cricket team T20I captain asütsü Ibrahim Zadrán shimogo.

ICC Men's T20 World Cup 2026 nung junga masayatetba sülen Afghanistan Cricket Board-i iba telemtetba agiba sangdongogo. Iba asayamung nung parnok league stage nung tsüka liasü. Zadrán-i leg-spinner Rashid Khan melenogo, shibai taoba mapang iba format nung team ania liasü.

World Cup sülen team nung temelenshi bener aruba mapang Zadrán shiba vice-captain liasü pa tang captain kümduksüogo.

Iba telemtetba agiba indang jembiba mapang chief selector Ahmad Shah Sulimankhil-i, "Rashid Khan captain ser asayaba mapang takok aika nguogo aser talisa 2024 küm T20 World Cup nung kanga junga asaya-a semifinal tonga liasü," ta ashi.

Paisa, tarutsü temulungdang yur iba telemtetba ya agi ta ashi.

"ACB tarutsü nükla temulungdang yur aser head coach tasen melenba densema tawa onok Team Management nung temelenshi adokba sülen onoki T20I asaya nung lenir melentsü atema telemtetba agi," ta paisa shisem.

"Ibrahim Zadrán, shiba Rashid Khan indang deputy liasü pa iba format nung Afghanistan indang regular captain kümogo. Rashid Khan-i teyari tulu agütsüba atema pa dang kanga pelar aser Ibrahim Zadrán lenisüba nung team takok ngua aotsü imlaja atar," ta Sulimankhil-i ashi.

Maneni squad nunga temelenshi adokogo aser Fazal Haq Farooqi, Gulbadin Naib aser Mohammad Ishaq nung meshim.

Kasa mapang nung asayar tasen Noor Rahman, Sharafuddin Ashraf aser Fareed Ahmad nung T20I squad nung züngoksemogo.

Harry Kane Borussia Moenchengladbach den masayatetsü



Harry Kane

Metsüremi/March 5, 2026 (Agencies): Harry Kane temola yiruba sülen Bundesliga nung Bayern Munich pur Borussia Moenchengladbach den asaya nung masayatetsü, ta coach Vincent Kompany-i Bresthostibarnü metetdaktsü.

England nung striker shibai tanga asaya aliba season nung Bayern atema kanga junga asayatsüdar, pa Mongolbarnü

Atalanta nung Champions League round of 16 mezüngbuba leg nungbo asayatetsü.

"Harry Kane masayatetsü. Pa temola yirur aliba tang tashi taneptsü mongui lir," ta Kompany-i Hokolbarnü iba

asaya masaya tsüngda osangbenertem den sensaksemba mapang ashi. "Pa temola tera yiruba dang lir aser


aneptsü mapang talangkabo magitsü, saka pa asaya tenzüksü atema ano anogo kabo agitsü," ta coach yagisa shisem.

"Onok kecha shisa mebulur. Onoki Harry asayadaktsüner, saka iba amala ya odang ataloker," ta pai ashi.

"Harry masayabashia tanga asayartem asayatsü asoshi imla alitsü," ta Kompany-i ashi.

Bayern pur parnok indang Bundesliga title defend asütsü asoshi merangba mapang parnok taoba hopta kanga dang tongtibang asaya ka kokogo. Parnoki tanabuba jenjang nung aliba Borussia Dortmund koka parnok point 11 agi timba kümogo.

Iba asaya nung Kane-i goal ana idaktsü aser iba goal densema pai tang asaya aliba season nung goal 45 idaktsür lir.



Manchester United aser Newcastle na asayaba mapang Newcastle nungi asayara William Osula (tabelen) aser Sen Neave na pelatepba noksa nung angur. Iba asaya Newcastle-i goal 2-1 agi koka liasü.

Paralympics 2026 lapokba sentong nung France shilem magitsü

Metsüremi/March 5, 2026 (Agencies): France indang sports minister-i Bodhbarnü sandong ka ajanga, Milan-Cortina Paralympics lapokba sentong nung shilem agitsü atema France nungi sorkar representative tem meyoktsü ta shiogo. Russia aser Belarusia nung asayartem iba asayamung nung parnok wako kübok tokteptsü melaba anema parnok iba jenjang agiogo.

International Paralympic Committee (IPC)-i taoba ita, Russia nung trok aser Belarus nung pezü neutral asayar ama masü saka pei linük tenüng nungi iba asayamung nung shilem agitsü melatsü ta osang agüja liasü. Iba asayamung ya March 6 nungi 15 tashi asayatsü.

Ukraine amakba sülen Russia aser Belarus na 2022 Paralympics nung shilem magidaktsü. Parnok ya küm ana sülen neutral athlete tem ama

Paris Summer Paralympics nungbo asayadakja liasü.

IPC-i iba osang sangdongba sülen Ukraine, the Czech Republic, Finland, Poland, Estonia, aser Latvia nung ajaki parnok asayamung lapokba sentong nung shilem magitsü ta shiogo.

Tang France-a parnok den denogo aser Hokolbarnü asayamung lapokba sentong nung shilem magitsü.

"Onoki mapang talangka kanga junga bilemdanger iba telemtetba agiogo aser takok tashi saisabong riju, IPC akümstübuttsü temulung yur agiogo, saka iba ya jenjang kar onoki memulungba ama agiba ajanga lir," ta France minister Marina Ferrari-i osangbenertem dang ashi.

Laisa, iba telemtetba ya asayamung shibangba sentong asoshia kasa dang asütsü, koba March 15 nü agitsü lir, ta ashi.

BILEMDANGANG

"Tangari na maliba jangjatsüsa inyangang."